

GARIZUMAKO V. IGANDEA (A)

Otoitza

Jainko gure Jauna,
zure Semeak, mundua maite zuelako
eta mundua salbatzeagatik,
heriotzara eramane zuen bere burua;
egizu, guk ere maitasun bera izan dezagula beti.
Zure Seme Jesu Kristo.

I. IRAKURGAIA: Ez 37, 12-14

*Nire espiritua emango dizuet Nik,
eta zuek bizi-berrituko zarete.*

Ezekiel Profetaren liburutik

Honela mintzo da Jauna: «Nik irekiko ditut zuen hilobiak, ateraraziko zaituztet zuen hilobietatik eta eramango zaituztet berriro Israelgo lurrera.

Eta Nik zuen hilobiak irekitzean, eta zuen hobietatik ateratzean, ene herri, orduan ezagutko duzue, Ni naizela Jauna. Nire espiritua emango dizuet Nik, eta zuek bizi-berrituko zarete; eta zeuen lurrean, ezarriko zaituztet, eta ezagutuko duzue, Nik, Jaun Honek, esan eta egin egiten dudala» –Jaunak esana–.

ERANTZUN SALMOA: Sal 129, 1-2. 3-4. 5-6. 7-8.

**R/. Jaunagan dago errukia,
Harengan askatasun ugaria.**

Barnenetik Zuri dagizut oihu, Jauna,
entzun, Jauna, nire mintzoa.
Beude erne zure belarriak,
nire oihu-eskarira. R/.

Gure erruak gogoan badauzkazu, Jauna,
nor dagoke zutik, Jauna?
Baina barkamena Zugar daukazu,
Zu begirunez zerbitza zaitzagun. R/.

Jaunagan itxaroten nago,
nire barrena Haren hitzaren zain dago.
Gaumutila goizargiaren zain dago:
nire gogoa Jaunaren zain dago. R/.

Gaumutila goizargiaren zain dago,
Israel Jaunaren zain hala bego.
Jaunagan baitago errukia,

Harengan askatasun ugaria.
Berak utziko du Israel askaturik,
egin dituen hoben guztietatik. R/.

II. IRAKURGAIA: Erm 8, 8-11

*Jesus hilen artetik piztu zuenaren Espiritua
zuengan bizi da.*

San Paulo Apostoluak Erromatarrei

Senideok: Haragiaren menpe aurkitzen direnak, ezin izan gogoko Jaungoikoari. Zuek, ordea, ez zarate haragiaren menpean aurkitzen, Espirituaren menpean baizik, Jaungoikoaren Espiritua zuengan bizi baita.

Norbaitek Kristoren Espiritua ez badu, hori ez da Kristorena. Kristo zuengan badago, ordea, gorputza hila dago bekatuarengatik; espiritua, berriz, bizirik zuzentasunarengatik. Jeus hilen artetik piztu zuenaren Espiritua zuengan bizi bada, Jesus hilen artetik piztu zuenak, bizieraziko ditu zuen gorputz hilkorrak ere, zuengan bizi den bere Espirituaren bitartez.

EBANJELIOA: Jn 11, 1-45

Ebanjelio aurreko txatata: Jn 11, 25a. 26

V/. Ni naiz piztuera eta bizia –dio Jaunak–;
Niregan sinesten duena ez da inoiz hilko.

Ni naiz piztuera eta bizia.

Jesu Kristoren Ebanjelioa San Joanen liburutik

Aldi hartan, [bazen gaixo bat Lazaro izenekoa, betaniarra, Mariaren eta honen ahizpa Martaren herrikoa; (Maria hau zen, Jesus gantzu usaigozodunez igurtzi zuena, eta oinak bere ile adatsez txukatu zizkiona. Honen anaia Lazaro zen gaixo zegoena).] Lazaroren bi ahizpek albiste hau bidali zioten Jesusi: «Jauna, Zuk maite duzuna gaixo dago». Jesusek, hori aditzean, esan zuen: «Gaitz hau ez da hiltzeko gaitz; Jaungoikoaren aintzarako baizik, gaitz honen bidez Jaungoikoaren Semea goretsia izan dadin».

Maiteak zituen Jesusek Marta, honen ahizpa eta Lazaro. Hau gaixo zegoela entzunda ere, beste bi egunez lehen zegoen lekuan jarraitu zuen. Eta egun haien buruan honela esan zien bere ikasleei: «Goazen berriz ere Judeara».

[Ikasleek esan zioten: «Maisu, orain berriki harrikatu nahi zintuzten judutarrek, eta hara joan behar al duzu berriro?»] Eta Jesusek: «Ez al ditu egunak hamabi ordu? Egunez dabilena ez da behaztopatzen, ikusten baitu mundu honetako argia; gauez dabilenak, ordea, behaztopa egiten du, ez baitu argirik». Eta jarraitu zuen: «Gure adiskide Lazaro lo dago; esnatzera noakio».

Ikasleek esan zioten: «Jauna, lo badago, sendatuko da». (Jesusek heriotza esan nahi zuen; haiek, ordea, loa esan nahi zuela uste zuten).

Orduan Jesusek garbi esan zien: «Lazaro hil egin da eta, zuengatik, pozten naiz han ez ginelako, zuek sinets dezazuen. Goazen hara». Tomasek, Bizkia zeritzanak, honela esan zien beste ikasle lagunei: «Goazen gu ere, eta hil gaitezen Berarekin batera.»

Etorri zen, bada, Jesus, eta Lazaro lau egun haietan hilobian zegoela aurkitu zuen. [Jerusalendik Betaniara orduerditsuko bidea besterik ez dago. Judutar asko etorri zitzairen Martari eta Mariari, anaiarengatik samin agurra egitera.]

Jesus zetorrela jakin zuenean, Marta bidera atera zitzaion; Maria, berriz, etxean gelditu zen. Martak esan zion Jesusi: «Jauna, Zu hemen gertatu bazina, nire anaia ez zen hilko. Hala ere badakit, Zuk Jaungoikoari eska ahala guztia, Jaungoikoak emango dizula».

Jesusek erantzun zion: «Piztuko da zure anaia». Eta Martak: «Badakit piztuko dela piztuerakoan, azken egunean».

Eta Jesusek: «Ni naiz piztuera eta bizia; Niregan sinesten duena, hilik ere, biziko da; eta Niregan sinetsiz bizi dena, ez da inoiz hilko. Sinesten al duzu hori?» Eta Martak: «Bai, Jauna, sinesten dut nik, Zu zarela Mesias, Jaungoikoaren Semea, mundu honetara etortzeko zena».

[Eta hau esanda, bere ahizpa Mariari deitzera joan zen, eta honela esan zion isilka: «Maisua hor dago, eta dei egiten dizu». Hori entzutean, Maria berehala jaiki eta Jesusengana joan zen. Oraindik ez zen Jesus herrian sartu; Martak topatu zuen lekuan zegoen. Etxean Mariari nahigabea laguntzen zeuden judutarrek, bat-batean jaikita joaten ikusi zutenean, jarraitu egin zioten, hilobira zihoalakoan, negar egitera.

Maria, Lazaroren arreba, Jesus zegoen tokira iristean, Hura ikusi zueneko, oinetara erori zitzaion ahuspez, eta esan zion: «Jauna, Zu hemen gertatu bazina, nire anaia ez zen hilko».]

Jesusek, Maria eta harekin etorritako judutarrak negarrez ikusi zituenean, barru-barrutik kupiturik galdetu zien: «Non sartu duzue?» Mariak erantzun zion: «Jauna, zatoz eta ikus». Eta Jesusek negarrari eman zion.

Judutarrek, orduan, honela zioten: «Begira zein maitea zuen!» Haietako batzuek, berriz, zioten: «Itsuari begiak ireki zizkion Honek, ez al zezakeen egin hau hil ez zedin?»

Jesus, berriro barrutik antsika, hilobira hurbildu zen. Haitzulo bat zen, eta harlosa bat gainean. Jesusek esan zuen: «Ken harlosa hori!»

Hildakoaren arreba Martak esan zion: «Jauna, usaina dario; lau egun baditu». Eta Jesusek erantzun: «Ez al dizut esan, sinesten baduzu, ikusiko duzula Jaungoikoaren aintza?»

Kendu zuten, bada, harria. Orduan, Jesusek begiak zerura jasorik, honela hitzegin zuen: «Aita, eskerrak Zuri, entzun didazulako. Nik badakit, beti entzuten didazula; baina inguruan dauzkadan hauengatik esaten dizut, Zuk bidali nauzula sinets dezaten».

Hau esanda, oihu egin zuen ozenki: «Lazaro, atera zaitetz kanpora!» Atera zen hilda zegoena, esku-oinak odol zapiz lotuak zituela, eta aurpegia hil oihalez estalia. Jesusek esan zion: «Aska ezazue eta utzi ibiltzen».

Egin zuena ikusita, Mariaren eta Martaren etxera etorritako judutar askok sinetsi zuen Jesusengan.

Oparigaien gainekoa

Entzun iezaguzu, Jainko ahalguztiduna,
eta egizu, opari honek garbi gaitzala
kristau sinesmenaz argitu gaituzunok.
Jesu Kristo.

Jaunartze ondorengoa

Jainko ahalguztiduna, iguzu,
orain Kristoren gorputz-odolekin bat egin dugunez gero,
beti Haren gorputzeko atal izan gaitzela.
Errege bizi baita.